

Jasna podrška javnosti za efikasnije provođenje zakona

Na okruglom stolu pod nazivom «Policija u službi zajednice» održanom danas u Sarajevu, predsjedavajući Komisije za restrukturiranje policije, Wilfred Martens, pozvao je predstavnike bh. nevladinih organizacija i stručnjake u oblasti provođenja zakona da ocijene način na koji agencije za provođenje zakona uspostavljaju veze sa zajednicama u čijoj su službi.

Na ovom okruglom stolu se razgovaralo o problemima koji potiču iz činjenice da policijski resursi često nisu raspoređeni efikasno ili racionalno, što je dovelo do parcijalnog pristupa rješavanju pitanja brzo rastućeg uticaja kriminala u BiH. Provjera funkcionisanosti policije u BiH koju je Evropska unija provela i prezentirala u julu mjesecu ove godine, ustanovila je da su policijske snage u BiH podijeljene, da imaju preveliki broj uposlenika, nedovoljno resursa, te da nisu u mogućnosti da rade preko međuentitetske linije razgraničenja.

Učesnici okruglog stola su iskoristili ovu priliku kako bi Komisiju za restrukturiranje policije upoznali sa svojim stavovima i mišljenjima. Postignut je sporazum da ukoliko se želi unaprijediti povjerenje javnosti u policiju, onda policija mora biti obučena da svoju ulogu vidi kao službu koja služi zajednici. Potrebne su tiješnje veze između policijskih institucija i građana kako bi se osigurala policija koja je u stanju da održava javni red i mir te vladavinu zakona.

Također je postignut konsenzus među učesnicima da policija nije opremljena da bi mogla na efikasan način rješavati naročito one vrste kriminala koje su u porastu, uključujući organizirani kriminal, trgovinu drogom i zloupotrebu droga, nasilje usmjereno na nacionalne manjine, problem maloljetne

delikvencije i naročito nasilje u porodici. Ove vrste kriminala nanose štetu tkivu bh. društva.

Predsjedavajući Martens je objasnio da budući koncept policijskog djelovanja u BiH mora započeti sa građaninom i usredotočiti se na pružanje kvalitetnih policijskih usluga. To znači da policija mora izgraditi partnerstvo sa zajednicom u kojoj radi, te sa civilnim društvom ukoliko želi ispuniti ulogu savremenih evropskih policijskih snaga. «Policija mora biti odgovorna građanima u čijoj je službi» naglasio je Martens.

«Evropska unija je stavila naglasak na pitanja pravosuđa i unutarnjih poslova u BiH», izjavio je Martens, dodavši da «restrukturiranje policije predstavlja jedan od 16 ključnih uslova za BiH kako bi otpočela pregovore o potpisivanju Sporazuma o stabilizaciji i pridruživanju. Ukoliko agencije za provođenje zakona u BiH ne mogu na efikasan način riješiti kriminal unutar granica BiH, onda promjena stava o zahtjevima za vize za imaoce bh. pasoša nažalost ostaje daleka i nesigurna mogućnost.»

Predsjedavajući Komisije Martens se obavezao da će osigurati da «se rad Komisije za restrukturiranje policije usredotoči na predlaganje struktura koje će promovirati efikasno obavljanje policijske djelatnosti u BiH,» dodavši da «komentari koje smo dobili naglašavaju zabrinutost civilnog društva i javnosti BiH, koji odlučno podržavaju potrebu da se pitanje kriminala riješi na efikasan način.»